

Breytingin hefur hlotið þá meðferð sem lög nr. 19/1964 mæla fyrir um. Bæjarstjórn Hafnarfjarðar hefur samþykkt hana og skipulagsstjórn ríkisins mælt með að hún verði staðfest.

Aðalskipulagsuppráttur Hafnarfjarðar er staðfestur var af ráðuneytinu hinn 18. desember 1982 breytist því í samræmi við ofangreint.

*Félagsmálaráðuneytið, 4. desember 1985.*

F.h.r.

**Hallgrímur Dalberg.**

*Pórhildur Líndal.*

## REGLUR

### um rekstur Stóðhestastöðvar ríkisins í Gunnarsholti.

#### 1. gr.

Stóðhestastöð skal starfrækt í Gunnarsholti í Rangárvallasýslu. Um kostnað af rekstri hennar fer eftir því sem fjárveitingar á fjárlögum heimila hverju sinni og samkvæmt nánari ákvæðum í reglum þessum.

#### 2. gr.

Landbúnaðarráðherra skipar formann stóðhestastöðvarinnar og aðra stjórnarmenn til fjögurra ára. Landsráðunautur í hrossarækt skal jafnan vera í stjórninni. Eftirtaldir aðilar skulu tilnefna mann í stjórn: Búnaðarfélag Íslands, Hrossaræktarsamband Íslands og Félag hrossabænda.

#### 3. gr.

Búnaðarfélag Íslands annast rekstur stóðhestastöðvarinnar og sér um fjárreiður hennar í samræmi við ákvarðanir stjórnar.

#### 4. gr.

Stjórn stóðhestastöðvarinnar ræður umsjónarmann og aðra starfsmenn hennar og skulu þeir hafa góða þekkingu á hrossarækt og kunna góð skil á tamningu og meðferð hrossa. Hrossaræktarráðunautur fylgist með daglegum rekstri í umboði stjórnar.

#### 5. gr.

Stjórn Búnaðarfélags Íslands tilnefnir menn í kynbótanefnd í hrossarækt til fjögurra ára í senn. Tilnefningar í nefndina skal leitað hjá Félagi hrossabænda, Landssambandi hestamannafélaga, sem tilnefni hvort einn mann og Hrossaræktarsambandi Íslands, sem tilnefnir tvo menn. Landsráðunautur í hrossarækt skal jafnan vera formaður kynbótanefndar.

#### 6. gr.

Val á hrossum sem tekin eru á stóðhestastöðina skal vera í höndum kynbótanefndar. Kynbótanefnd ákveður notkun allra stóðhesta til kynbóta á meðan þeir eru á vegum stóðhestastöðvarinnar. Hún ákveður hve lengi þeir eru á stóðhestastöðinni og hvort eða hvenær hestar í eigu hennar eru vanaðir. Kaup og sala á hestum er háð samþykki stjórnar.

Stjórn stóðhestastöðvarinnar ákveður fjölda stóðhesta sem eru hverju sinni á vegum hennar og hve margir þeirra mega vera í eigu einstaklinga.

## 7. gr.

Stóðhestastöðin leggur til húsnæði fyrir stóðhesta í eigu einstaklinga og annast á sinn kostnað tamningu þeirra. Allur annar kostnaður sem fellur á stóðhesta í einkaeign greiðist af eigendum.

## 8. gr.

Stóðhestastöðin hefur ráðstöfunarrétt á folum í einkaeign sem vistaðir hafa verið á vegum hennar til og með sumri eftir fimmta aldursár folanna.

Folatollur sem greiðist á fola þessa framangreindan tíma fellur til stóðhestastöðvarinnar.

## 9. gr.

Kynbótanefnd kemur saman minnst tvisvar á ári. Á fundi sem haldinn skal í nóvember ber að taka ákvörðun um val stóðhesta á stóðhestastöðina. Á þeim fundi skal gerð starfsáætlun fyrir næsta starfsár sem lögð er fyrir stjórn stóðhestastöðvarinnar.

Á fundi sem halda ber á tímabilinu apríl-maí skal kynbótanefnd dæma kosti stóðhesta, hverjir skuli sýndir á kynbótasýningum, svo og um grisjun hópsins.

## 10. gr.

Stjórn stóðhestastöðvarinnar skal árlega gera áætlun um rekstur fyrir næsta fjárlagaár og skal þeirri áætlun skilað til landbúnaðarráðuneytisins með tillögum Búnaðarfélags Íslands um fjárframlög í samræmi við ákvæði búfjárræktarlaga.

Stjórn stóðhestastöðvarinnar ákveður daggjöld sem eigendum hrossa er gert að greiða.

Stjórnin ákveður leigugjald fyrir afnot af stóðhestum og skulu stóðhestar flokkaðir í leiguflokka eftir aldri og þeim dómum sem þeir hafa hlotið. Leigugjöld skulu ákveðin með hliðsjón af leigu á sambærilegum stóðhestum í landinu hverju sinni.

Rekstur stóðhestastöðvarinnar skal við það miðaður, að laun umsjónarmanns tamningamanna, svo og kostnaður af fasteignum og lausafé, greiðist af framlögum samkvæmt búfjárræktarlögum, en að öðru leyti standi tekjur undir rekstri.

## 11. gr.

Stjórn stóðhestastöðvarinnar er heimilt að greiða flutningsstyrk á stóðhesta sem fara frá henni til nota í hrossarækt, þannig að sem mestur jöfnuður sé um flutningskostnað milli landshluta.

## 12. gr.

Tilraunir með fódrun hrossa, vaxtarmælingar og aðrar rannsóknir, sem ástæða þykir til að fari fram, skulu skipulagðar og unnar í samvinnu við Rannsóknastofnun landbúnaðarins.

## 13. gr.

Stjórn stóðhestastöðvarinnar er heimilt að semja við Landgræðslu ríkisins um afnot húsa og lands í Gunnarsholti eftir því sem þörf krefur.

## 14. gr.

Reglur þessar, sem eru settar samkvæmt heimild í 36. gr. búfjárræktarlaga nr. 31/1973, staðfestast hér með til að öðlast þegar gildi og birtast til eftirbreytni öllum þeim, sem hlut eiga að máli.

*Landbúnaðarráðuneytið, 3. desember 1985.*

**Jón Helgason.**

*Jón Höskuldsson.*